



30. september 2010

Inatsisartut suleriaasiat § 36 immikkoortoq 1 naapertorlugu Naalakkersuisunut imaattumik apeqquteqarniarpunga.

**Naalakkersuisunut Apeqqut:**

**Kalaallit Nunaanni Qatserisartut upalungaarsimanermi sillimasuunertik pissutigalugu soraarsitaanissamik siorasaarneqartarnerat Naalakkersuisut qanoq iliuseqarfiginiarpaat?**  
(Inatsisartuni ilaasortaq Kim Kielsen, Siumut)

**Tunngavilersuut:**

Kalaallit Nunaanni Qatserisartut Peqatigiiffiat tamatsinnut imaattumik allagaqarpoq:

”Ataqqinartut Inatsisartuni Ilaasortat, Naalakkersuisullu. Ajornartorsiut una ersarissalaarusullugu suliffeqarfiutissi ilaanni ajornartorsiutaasoq ilaasortatsinnit.

Namminersorlutik Oqartussat suliffeqarfiutaanni sulisoq ilaasortarput qatserisartuni ilarput oqarfigitissimavoq tulliani alarm-imukaruni soraarsitaassasoq. Tusarlugu nakeriallannartorujussuuvoq, tassami piumassutsitsinnik inuiaqatigiit sullikkusullugit piffissarujussuaq pilliutigisartagarput pisortat suliffeqarfiutaasa suusupagissappassuk sumiissaagut?

Taamaattumik ikinngutinnersumik qinnuigaassi ersarissalaaqqullugu Namminersorlutik Oqartussat sulisuminnut qatserisartuusunut qanoq politikkeqarnersut. Isumaqaramami marloqiusamik oqaluttoqartoq, illuatungaani politikikkut upalungaarsimaneq pingaartinneqartoq, illuanilu upalungaarsimasuusut upalungaarsimanertik pissutigalugu soraarsitaanissamik siorasaarneqarlutik. Taanna ersarissarneqarnissaa assorsuaq kissaatigeqara.”

Naalakkersuisut ajornartorsiut tamanna anigorniarlugu qanoq iliuseqarniarnersut paaserusullugu atumuuna apeqquteqaammik nassiussivunga.

Kissaatigaara apeqqutima ullut suliffiusut qulit qaangiutsinnagit allakkatigut akereerneqarsimanissaa.